

2. April 2019

**Naalackersuisut kingusinnerpaamik UPA2020-imut Aasianni annertuumik innarluutilit angerlarsimaffiannik pilersitsinissaminnut pilersaarusoqqullugit peqquneqarnissaanik siunnersuut.**

(Inatsisartuni Ilaasortaq, Stine Egede, Inuit Ataqtigiit)

Inatsisartunut ilaasortap Stine Egede Inuit Ataqtigiit siunnersuutaa Siumumiik imatut oqaaseqarfigissuarput.

Siumumiik oqaatigissuarput nunatsinni innarluutilittatsinnut sullissinitta ullumikkorniit annertunerujussuarmik ilisimasaqarfigalugu ingerlatsinissarput kissaatiguaratsugu.

Annertuumik innarluutilittagut eqqarsaatigalugit Inatsisartut Naalackersuisullu tungaaniit pingaartitsinerput takussutissaqarlernikuusoq sulii annertunerusumik ingerlattariaqarippoq Siumumiik kissaatigaarput.

Soorluttaaq Naalackersuisut akissutaani takusinnaagipput Naalackersuisut ulloq unnuarlu innarluutilinnut paaqqinniffiit ineriartorteqqinneqarnissaannik siunertalimmik Danmarkimi suliffeqarfik suleqatigilersimagaa.

Siunnersuuteqartup siunnersuutingisaa misissuataarparput tungavilersuutaalu assortorsinnaanatigit. Taamaakkaluortoq nutaamik pilersitsisoqassappat ajornartorsiutaasussat ilanngullugit misissuataarpagut.

Soorlu Naalackersuisut akissuteqaataanni takuneqarsinnaasoq, ullumikkut ulloq unnuarlu paaqqinniffinni sulisut taarseraappallaarnerat, aammalu sulisussanik ilinniarsimasunik sulisussarsiniartarnek pingaarnertut unammillernartuusut. Tamannalu inatsisitigut pisussaaffiummat ukiumoortumik Naalackersuisuniit Inatsisartunut tunniuttagaanni takuneqarsinaavoq.

Taamaammat nutaamik pilersitsinikkut innarluutilinnut ulloq unnuarlu paaqqinninnigut pitsanngorsinnanersut Siumumiik nalornissutigaarput.

Siunnersuutigineqartorli aallaavigalugu tassungaannaq killittoqartariaqanngittoq Siumumiik isumaqarpungut. Ulloq unnuarlu paaqqinniffitsinni nukiit ilisimasallu pioreersut qanoq atorluarniarpagut. Ilisimavarpummi allaat Danmarkimi sullivinni tamakkunani sulisussarsiorneq ajornakusoortorujussuusoq.



Naalackersuisut siunnersuummut itigartitsigaluartut Siumumiik kissaatigaarput Ilaqutariinnermut Peqqissutsimullu ataatsimiititaliamut ingerlanneqassasoq. Tassuunaqqullugu peqqissaartumik suliarineqarnissaa kissaatiginarmat.

Tassanittaaq ilanngullugu qanigisat sumiiffii apeqquaatinnagit orninneqarsinnaanerisa periarfissaasa pitsanngorsarsinnaaneri Siumumiik oqaloqataaffigerusukkatsigit.

Jess Svane

SIUMUT